

# Materialismo i Moralidat

Dos siman pasá, un invitado bon konosí a duna un charla na nos isla. Segun korant, “fuertemente a bin dilanti” e oradó “su konvikshon ku loke ta konta ta aspekto material, i moralidat i spiritualidat no tin masha balor”.

Mi no a skucha e charla i mi tin poko informashon. Debí ku mi pusíbelmente a mal komprendé pensamentu di e oradó, ta imprudente pa mi komentá riba e charla òf e oradó.

Ma tòg e filosofia ekspresá den e frase chikitu ta molestiámi.

Pensa un ratu loke e frase ta ekspresá. Si kos material ta loke ta importante, bo meta den bida mester ta pa haña i usa kos material. Gobernantenan mester konsentrá riba loke ta material. Pa ku loke ta moralidat, étika, i spiritualidat, por wèl lubidá!

Maske poko hende lo ekspres’ é asina bòt, sin duda hopi hende ta biba segun e filosofia materialista! Pa nan, kos material ta loke ta konta. Nan ta biba pa plaka, kas, televishon i kabel, outo nèchi, kompiuter, moda, èts. I pa nan, e parti spiritual-moral no ta prioridat! Sin duda e mentalidat materialista ta masha komún na nos islanan.

No malkomprendé. Kos material ta importante. Dios mes a kre’ é. **Ma kos material ta bira un problema serio ora e tin prioridat riba e parti spiritual-moral!** Nota algun problema.

1) E manera pa yega na kos material sin moralidat. Si kos material ta importante i moralidat nò, anto bo meta lo ta pa haña kos material irespekto di a manera bo ta haña nan. **KON bo ta haña kos material no ta importá, basta KU bo ta haña nan.**

Si moralidat no ta importante, mi por drenta den bo kas, kohe tur bo sèn i bai ku kualke kos di balor. Mi por falsifiká mi belasting pa paga ménos. Mi por tuma sèn bou di mesa pa ignorá siertu regla ku ta protehá pa nos komunidat. Mi por pone biyèt falsu den sirkulashon. Mi por kobra un preis astronómiko pa kos ku no ta sirbi. Mi por kometé atrako mes pa haña sèn. Pakiko nò? Materialismo, no moralidat, ta konta!

2) E uso di kos material isolá di moralidat. Si kos material ta importante i étika nò, no ta importá kon bo ta usa kos material.

Un kompiuter, internet, i e-mail por ta un bon kos. Ma si nos ta isolá esakinan for di moralidat, anto mi por krea mi mes víro i dañá tantísimo kompiuter. Mi por manda e-mail pa bo ku tur klase di vulgaridat, insulto, i menasa.

Un hende ku no a siña moralidat, lo usa kos material na un manera ku no ta étiko. Un kuchú ta algu bon i util. Ma un kuchú den man di un persona sin eskrúpulo moral ta un menasa serio. **Edukashon moral ta determiná kon bo ta usa kos material.**

3) E konsekuensia di biba pa kos material isolá di moralidat. Dia lo yega ku kada un di nos tin ku para dilanti nos Kreador i duna kuenta pa nos bida. Hesus a yama “*e hende ku ta montoná tesoro pa su mes (parti material), i no ta riku pa ku Dios (parti spiritual)*” bobo (Lukas 12:16-21). Ademas, El a hasi e pregunta penetrante, “*...ki probecho un hende lo tin si e gana henter mundu, ma pèrdè su alma?*” (Mateo 16:26). Ora bo yega na fin di bo bida, kos material no por salvábo! Solamente si bo konfia Hesu-Kristo so pa salvábo for di fièrnu (e parti spiritual) lo bo por haña entrada serka Dios!

Sin duda, nos islanan ta kosechá e resultado di bai tras di kos material i a ignorá e parti spiritual-moral. **Nos tin problema serio ku kriminalidat netamente pasobra hende ta konvensé ku kos material ta loke ta importante i no moralidat!**

Dios a avisá di e peliger di kos material. El a bisa, “*..amor pa plaka ta rais di tur sorto di maldat, i algun hende, dor di deseá esaki, a desviá for di e fe, i a tras pasá nan mes ku hopi doló*” (1 Timoteo 6:10). Nos ta eksperenshá e “*hopi doló*” pasobra nos a stima plaka. Pa kambia e situashon, nos mester hasi e parti spiritual-moral mas importante ku e parti material!